



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno MDLX. ad annum MDCXXIII.

Parisiis, 1644

Edctvm De Concilio Provinciali III.

urn:nbn:de:hbz:466:1-15522

in responsis breuis, acutus & grauis, ad audiendum patiens; omnibus accessu facilis; studiis piis & maxime legum sic addictus, vt quidquid temporis contemplationi grauibusque curis superesset, lectioni & studio impenderet.

ANNO
CHRISTI
1573.
CONCILIVM MEDIOLANENSE III.
P R O V I N C I A L E.

Quod Carolus Borromæus sanctæ Romanæ ecclesiæ cardinalis tituli sanctæ Praxedis, archiepiscopus Mediolanensis, habuit anno a Christo nato MDLXXIII. Gregorio XIII. pontifice.

EDICTVM DE CONCILIO PROVINCIALI III.

*In nomine sanctæ & indiuiduæ Trinitatis, Patris & Filii
& Spiritus sancti. Amen.*

Carolus Borromæus sanctæ Romanæ ecclesiæ tituli sanctæ Praxedis presbyter cardinalis, Dei & apostolicæ sedis gratia archiepiscopus sanctæ Mediolanensis ecclesiæ, vniuersis prouinciæ nostræ fidelibus salutem in Christo Domino.

D I V I N Æ pietatis abundantia perfectum est, vt cuius disciplinæ vestigia olim a sanctissimis patribus pressa non leuiter, sed fixa ad sempiternam rei Christianæ bene gerendæ rationem, vix in tantis morum erroribus vlla reliqua vsquam apparebant; ea quasi ex tenebris in lucem reuocata sit grauissimis & diuinis sacrosancti Concilii Tridentini sanctionibus: quibus cum omnes sane quidem obtemperare oporteat, tum eos in primis, quos auctor vitæ nostræ & magister salutis aternæ Christus Dominus episcopos & pastores gregis esse voluit, quem is sanguine suo, in ara crucis profuso, redemit. Itaque pastoralis curæ nostræ ratio, quæ in Tridentinis illis iussis, iisque sanctissime exequendis, versari debet, nos commonet, atque adeo commonet, vt hoc anno, qui tertius est, quo Mediolani alteram prouincialem Synodum habuimus, eam ad eiusdem Tridentini Concilii præscriptum tertio conuocemus: idque eo consilio, vt nos, qui metropolitico iure prouinciæ huius curam gerimus, pro debito archiepiscopalis speculationis nostræ officio, sedulo primum perqui-

ramus, si quæ sunt, quæ Tridentinis decretis, aut eorum auctoritate, Canonumque iure a nobis in vna atque in altera item Synodo ad restituendam pristinam illam ecclesiasticam disciplinam iam pridem sancita, nondum ab iis, quorum interest, in hac prouincia præstita sunt; in his exequendis, duce Spiritu sancto, qui spiritus est intellectus, sapientiæ & consilii, pastoralis studio & diligentia incumbamus: tum præterea videamus, si quæ alia sunt, quæ subdolo operario satana, morum corruptelis, vel inueterata, vel nuper prauè introducta, vllam emendationem, vel in controuersis prouincialibus iudicium a nobis desiderent.

Quamobrem omnes & singulos huius nostræ prouinciæ episcopos, tum literis eo potissimum nomine vnicuique eorum scriptis, tum hoc etiam publico edicto, ad prouincialem Synodum Mediolanum conuocamus: cuius etiam Synodi inchoandæ certum diem, nempe vigesimum quartum mensis Aprilis proxime sequentis, quo statuto die mane in metropolitanam nostram ecclesiam conueniant, præscribimus. Vt autem ceteris omnibus atque singulis, qui possunt, debentve iure aut consuetudine, aut priuilegio eidem interesse, peruulgata sit, ac nota huius nostræ prouincialis Synodi tertix indictio; neve cuiquam vel rei ignorantia ad excusationem vti, vel se contemptum, neglectumve esse, dicere liceat; iis ipsis vniuersis ac singulis, tum ceteris qui sua interesse quauis ratione putarint, hoc edicto publice proposito, illam eisdem significamus, indicimus, ac denuntiamus: iubemusque item illos ipsos omnes & singulos, qui interesse debent, huc in prouincialem Synodum conuenire ad constitutam diem, pœnis illis propositis, quæ canonicis sanctionibus decretæ sunt.

Curent autem comprouinciales nostri episcopi, id quod posteriori prouinciali Concilio sancitum est, vt cum primum hoc edictum acceperint, quo prouincialis Synodi celebrandæ certa dies indicta est, in omnibus & vrbs & diœcesis suæ parochialibus ecclesiis, quinta quaque feria in singulas hebdomadas, quo ad illa de more absoluta, ac dimissa erit, Missæ sacrum de Spiritu sancto fiat: In cathedrali autem & collegiatis ecclesiis processionum præterea mu-

ANNO
CHRISTI
1572.

nus singulis diebus dominicis obeatur, precationibus adhibitis pro optimo conciliarium rerum tractationis euentu.

Omnes praterea prouinciæ nostræ fideles id monemus, & per viscera misericordiæ Christi Domini hortamur, vt omni pietatis Christianæ studio & religiosi precibus, iisque assiduis, a Deo consolationis & misericordiarum patre, nobis, negotium tam salutare tractantibus, auxilium implorent: quo nos adiuti, in hac tractatione omnia consilia, sermones & actiones nostras in finem dirigamus, nempe in Christum Iesum, cui in omni iustitia & sanctitate seruire debemus. In quarum rerum omnium fidem hoc edictum confici, auctoritateque nostra imprimi, & nostro signo muniri, tum nostra etiam manu signatum in vulgus publice proponi, eidemque a synodali secretario nostro subscribi volumus. Datum Mediolani die 20. Februarii 1572.

EDICTVM ALTERVM
DE CONCILIO PROVINCIALI TERTIO,
quod ob causas prorogatum fuerat.

*In nomine sanctæ & indiuiduæ Trinitatis, Patris & Filii
& Spiritus sancti. Amen.*

*Carolus Borromæus sanctæ Romanæ ecclesiæ tituli sanctæ Præ-
xedis presbyter cardinalis, Dei & apostolicæ sedis gratia ar-
chiepiscopus sanctæ Mediolanensis ecclesiæ, vniuersis prouin-
ciæ nostræ fidelibus salutem in Christo Domino.*

ATERNVS pontifex, vnigenitus dei Filius, Christus Iesus, qui e sinu Patris in terram missus, fidelium animas redemit per effusionem immaculati sanguinis sui, eam nobis pastoribus animarum curam proposuit, vt omni solitudine oues, fidei nostræ commissas, a vallibus ad montes, a terrenis scilicet rebus ad cælestes, ab humanis ad diuinas, a caducis ad æternas reuocare studeamus.

Hæc sane cura plena studii, plena diligentia, refertaque omni labore, cum in ceteris pastoralibus muneribus, tum in iis etiam exequendis nos valde sollicitos habere debet, quibus Tridentina Synodus & ipsis patrum officiis & animarum saluti & prouinciarum vtilitati consultum ef-